

今

言

全言卷之三

海鹽鄭曉

一百七十九

初設內閣楊文貞公歷二十三年官止五
品后加至少師止兼兵部尚書華蓋殿大
學士三官蹇忠定公以少師兼吏部尚書
掌部事不欲文貞班在忠定上以存冢宰
統百官均四海之職陳芳洲雖五官亦止

戶部尚書此後惟李文達公以吏部侍郎
後領吏部尚書而彭文憲商文毅萬安相
繼領吏部尚書自後遂爲首相故事正德
嘉靖間遂有一內閣皆領吏部尚書者

一百八十

景泰四年九月以太常少卿兼侍讀學士
陳詢爲國子祭酒時祭酒王恂卒監丞安
貴言太子少師侍郎學士蕭鎡任祭酒諸

生悅服乞照胡儼例不妨內閣職務時來提督儀刑後學上不許以詢代恂永樂中儼寔出爲祭酒不復入內閣也

一百八十一

景泰四年六月戶部尚書金濂上京官折俸銀除公侯駙馬伯武臣每季十二萬四千三百十二兩奇文臣三千五百八十九兩奇

一百八十二

景泰四年刑科給事中曹凱言比者戶部
請聽軍民官吏輸豆如輸豆四千石以上
授指揮歷俸十六七年償彼豆倍半矣又
令管事世襲以生民脂膏養無功之子孫
於無窮也有功者必曰吾累世忘軀獲此
官彼輸豆亦獲此官朝廷以吾軀命同於
菽粟其誰不解體起端雖微弊流甚大乞

勅輸粟豆授武職者帶俸不任事不世襲
犯贓罪如文職止許原籍衙門帶俸終身
上曰凱言有理已授職者仍舊管事承
襲今後悉如凱言

一百八十三

宣廟坐左順門少保原吉等侍因語及古
人信讒事 上曰讒慝小人真能變白爲
黑誣正爲邪聽其言若忠究其心則險是

以帝舜聖讒說孔子遠佞人唐太宗以爲
國之賊朕於此等每切防閑有萌必爲杜
絕不使姦言得入枉害忠良齊殺斛律光
國遂以弱朕常爲恨汲黯正直姦邪寢謀
卿等所宜法也原吉等頓首曰幸遇聖
明臣等敢不竭盡愚直

一百八十四

嘉靖甲申大同伍堡軍叛殺巡撫張文錦

參將賈鑑時總兵江桓坐視不能討賊朝廷罷桓以桂勇代之令桂疾驅入大同誅首惡撫脅從且遣都督魯綱總兵侍郎胡錠提督軍務率兵屯陽和堡候勇誅首惡撫定即班師勇已誅郭巴子等首惡十七人錠綱以爲功非已有起營而西大同軍復閉門及罵勇倒鬼誑我縛勇欲殺之勇不屈言汝等再殺我闔城無噍類矣乃釋

勇盡殺勇家丁代王微服走宣府錠等又
妄言功奏捷中朝皆知之不得已召還京
是時內閣費宏不欲再用兵幸無事余及
甌寧李默各上疏乞討賊李疏報聞余疏
乙酉正月十七日進留中薊州總兵馬永
亦請自率兵討賊不聽以故大同叛軍至
今爲邊鎮大禍

河套古朔方我朝自正統後漸棄東勝於是河套遂爲虜巢然亦時去時來近年吉囊俺答二酋連歲殘破秦晉久駐套中先朝大臣屢有復套之議成化八年遣吏部侍郎葉文莊公行視文莊以爲未可輕議特繕障增戍謹備之便九年遂移延綏鎮城於榆林此余肅敏經畧之功也王恭襄公又以肅敏爲失策嗣後楊邃庵亦屢議

及河套然亦財力不給不敢力主其事旋
議旋罷嘉靖丙午侍郎曾銑自山西移爲
陝西總督上言復河套事內批嘉獎然中
外皆知兵弱財窘且無文武將吏恐撓強
胡禍不可解然亦顧忌莫敢言者銑區畫
兵食關中騷動人有怨言又請戶部銀多
至四百萬兩人益不喜銑又劾河西總兵
威寧侯仇鸞鸞被逮會丁未仲冬澄城山

裂而移者相去四五里有分崩離折之象
是冬臘月辛未京師大風霾 今皇帝敬
天疑畏以套議問輔臣分宜言貴溪左右
銑爲此議者臣不得預臣亦不能止不敢
言 上遂大怒逮銑奪貴溪輔弼官以尚
書致仕而咸寧侯又發銑匿出塞喪師諸
事賄貴溪得解及河套不可復狀 上益
怒貴溪行至丹陽逮繫入京銑事下錦衣

訊上又下法司會官擬銑罪法司言銑犯
無正律上怒令再議竟論死銑爲御史
時計擒遼東叛軍有功陞大理寺丞又尋
陞僉都御史巡撫山東時山西被虜數寇
殘移銑山西山西二年得無虜患又寇陝
西時陝西總督尚書張璠謫戍銑代之貴
溪至京論死坐交結近侍律也

王虎谷爲祠祭郎中疏請嚴試僧道精通
玄典者始與度牒王晉谿問之曰兄謂此
可塞異端乎若如兄策此輩欲得度必有
精通玄典者出於其間今二氏之徒苟且
爲衣食計尚不可遏塞與吾儒爭勝負若
使精通玄典又可奈何虎谷嘆服

一百八十七

團營始於景泰三年于肅愍公建議也兵

制本三營一曰五軍肄戰陣一曰神機習
火器一曰三千備宿衛此三營中選健銳
者合營團操故曰團營然原營之名終不
改如軍選自三千營團操於立威營即名
爲立威三千營五軍神機亦如之是三營
之有團營卽選鋒也今又於團營中選官
軍別名東西官廳操練名聽征而聽征者
亦不足用兵部尙書提督團營將校以黜

陟所在乃肯奉法若別設一尚書專領營務彼知其權輕不肯受約束掌印尚書又恐一旦有警督營尚書便當統兵四征又力辭營務耳

一百八十八

紫荊之有提督都御史自孫祥始也薊州之有邊備都御史自鄒來學始也皆景泰初事嘉靖庚戌俺答犯京城畿內設官多

矣紫荊有艾希淳又有侍郎翁萬達經畧
薊州有吳嘉會又有侍郎何棟提督通州
有都御史王忬天壽山有都御史許宗魯
坐院都御史商大節經畧京城內外若景
泰時都御史又有河間蕭啓真定陸矩保
定祝暹居庸王竑巡關侍郎江淵紫荊白
羊倒馬大理卿孔文英少卿曹泰寺丞段
信泰尋改叅贊京圻涿易直隸通五路軍

務

一百八十九

沿邊諸鎮惟遼東最易治虜寡亦弱又
我官賞交市且地饒魚米鹽馬近年撫
於敖減賜物又計殺虜酋遂失虜心嘉靖
丁未撫臣胡宗明因虜屢來侵掠撲殺虜
百八十人虜大恨戊申春結衆深入遼西
殺掠人畜萬計宗明及總兵戴廉罷任聽

勘起李珣代宗明珣未行被劾得留用珣
素有才操履亦慎大獄謫戍後起撫山西
遂不及曩時

一百九十

永樂十七年十二月勅五軍都督府北京
留守後軍都督府兵部邇來軍伍空缺器
械損敝互相蒙蔽欺誑百端豈欲實朝廷
危社稷乎其急整飭違者必殺無赦

一百九十一

廖均卿江西人精地理 成祖擇壽陵久
不得吉壤永樂七年 仁孝皇后尚未葬
禮部尚書趙玚以均卿至昌平縣徧閱諸
山得縣東黃土山最吉 成祖即日臨視
定議封爲天壽山命武義伯王通等董役
授均卿官或曰定長陵者王府尹也亡其
名亦不知何許人

一百九十二

新建伯王公爲汀贛都御史據江西上流
意藩府久蓄逆謀恐一旦變起先事預防
以討山賊爲名請得提督軍務兵書王晉
溪知公意請如公言正德十四年六月宸
濠反公適勘事福建道經豐城縣令顧泌
告公宸濠反狀公急走小舸返至吉安與
知府伍文定起兵討賊發檄召江西諸知

府邢珣等兵又密遣諜四出投檄言京師及湖廣廣東西南京淮安浙江各發兵討賊以疑宸濠使不敢出南昌又致叛臣家族謬託心腹云吾直應勅旨且聚兵耳又曰寧王事且成敗未可知吾安能遂進兵賊果疑四路兵且至不敢直趨南京又喜公或不進兵遲回數日出南昌攻南康九江安慶公兵大集始傳檄罵宸濠賊又

遣人致書與賊心腹李士實劉養正及閔
廿四吳十三若勾約內應者書旣發故令
人洩賊黨書所過處賊黨以告宸濠宸濠
盡得致書人及書遂疑士實等士實等勸
宸濠去安慶直趨南京否徑出蘄黃趨京
師宸濠不聽公進兵攻破南昌擒其居守
宜春王拱條等及宸濠子三哥四哥宸濠
時攻安慶聞之解圍反顧巢穴公迎戰樵

舍縱火攻之大破賊擒宸濠及其子大哥
當是時南京大震非公牽制上流疑賊賊
不犯南京必走蘄黃矣公旣擒宸濠諸奸
江彬等導上南巡下詔親征諸奸欲攘
功忌公危言巧譖百方欲去公當是時宸
濠未死諸奸素通宸濠得金錢者多在
上左右頗有異謀畏公不敢發公深機曲
筭內戢奸倖外防賊徒撫定瘡痍激勵將

士日夜如對勅敵宸濠竟得伏誅內閣大臣素惡晉溪亦忌公而公以提督軍務故得專制召兵平賊歸功晉溪內閣不說久之不論功 今皇帝即位詔錄公功封新建伯兼南京兵部尚書叅贊機務遣使迎至京宴勞諸忌者又以晏勞費爲詞嗾言官論阻公不得至京外艱去服闋竟不召讒謗益起屢形奏牘雖封爵賜號竟不與

鐵券歲祿一時勤王有功諸臣中傷廢斥殆盡惟文定得陞副都御史廕一子千戶邢珣徐璉戴德孺陞布政使德孺死於水珣璉亦被斥陳槐削籍紀功御史伍希儒謝源以考察去官公不自安累疏辭封乞錄諸勤王者功竟格不行

一百九十三

麻陽之役師老財匱言官論奏竟爾中輟

初廣貴二省撫臣謀議不合起萬治齋鏜
勘處治齋不欲用兵力言撫便已有端緒
遽召還京已而賊復出抄掠湖撫姜儀貴
撫王學益請合兵進勦楊叅將赴湖過辰
州爲賊所縛姜畏罪上言王兵失期不至
內批切責務期盪平四川巡按袁鳳鳴遂
劾王逮下詔獄以李義壯代王用兵數月
日費千金官軍頓挫人畜殘破遂罷兵姜

降三級外任蓋歎既無功撫又失策矣自
古南蠻與北狄不同四夷經見者自三苗
始于羽兩階今可鑒也本朝累有征蠻之
役未有得全勝者蓋寧河武順王時然矣
一百九十四

謚端者惟三太宰謚文端端毅端肅一司
徒文端一司馬端敏近日秦鳳山亦端敏
吳白樓亦文端

一百九十五

陝西脩邊正德初楊文襄公建議經理爲
逆瑾所惡被逮去兵部以修牆議是上文
貴張彝曹元三人乞簡一人繼成其役瑾
不肯盡取修牆銀鎔爲大鐘入瑾私室至
嘉靖八九年王恭襄公起督陝西修花馬
池一帶邊牆三百里甚堅壯可恃先是寧
夏巡撫徐廷章延綏巡撫余子俊皆有脩

邊之功史琳亦嘗請經畧花馬池邊塞而
秦襄毅公爲總制不以爲然止築肆伍小
堡弘治甲子乙丑虜大入花馬池塞殘破
陝西以是簡用文襄竟爲權奸所沮

一百九十六

越國公守蘭溪獲月庭和尚檢囊中有天
文地理書越公留之帳下上征婺州越
公與月庭見上并上其書上喜問月

庭師何人曰師龍游朱德明德明精於天文及得婺州立觀星臺上與月庭夜登臺觀乾象令長髮爲取妻月庭與鐵冠道人議論時不合又出語犯上安置和州參軍郭景祥奏和尚怨謗遣人至和州杖之死又有復見心者能詩文上時召見賜食見心本名天淵髯長尺許仕元爲學士元亡削髮爲僧髯如故上怪而問之

曰削髮除煩腦留鬚表丈夫

一百九十七

大禹治河易今治河難大禹時直欲除害
今併欲興利以故甚難旣欲順其流不逆
水性必難得其濟漕運旣欲濟漕運難保
淮西陵寢無衝決之患大名張秋濟寧徐
州處處畏河患又必須引之東南流雖大
禹治之恐亦便無長策以故中漕之運及

膠河故道皆不可不早啗之膠河即今所謂南北新河不出登萊大洋之險直自安東至海倉三百里耳

一百九十八

嘉靖壬寅北虜孔棘兵書張瓚恐統兵出禦於會推總督文臣疏中歷舉往年禦虜皆遣都御史故事奏下吏部時文選郎中謂余曰往時邊事急推總督文臣皆兵部

會府部諸衙門議上今乃移吏部又必欲
推都御史奈何余曰渠負國恩邊事大
壞今猶爲此奸巧渠獨不知虜棘本兵自
出乎天順五年孛來寇陝西馬昂統兵木
麓川之役王驥嘉靖初河西之役金獻民
皆本兵也景泰時于少保自請行邊嶺南
蠻反用兵久無成功議設兩廣總督于少
保亦自請行此獨非故事耶已而廷推首

上瓚次毛伯溫劉天和三人皆兵書毛掌
院劉督團營又次起用翟鵬 內批用鵬
一百九十九

張三丰遼東懿州人名君實字全一又字
玄玄別號保和容忍三丰子不飾邊幅人
號張儼偁日行千里靜則瞑目旬日一啖
升輒盡又或辟穀數月洪武初至太和
往來長安隴西岷州甘肅又至揚州

成祖遣禮科都給事中胡濙名求儼儼寔
訪故君云或曰三丰死於勝國歟矣臨窆
復生入蜀遊行襄漢間

二百

嘉靖癸卯王湛泉與齡爲文選郎中起用
周恭肅公以工部尚書總理河道忌王清
勁者倡言河道無用尚書故事王以問余
余曰永樂初開會通河尚書宋禮實始其

事西涯詩所謂幾度會通河上過竟無人
說宋尚書者是也景泰時河決張秋尚書
石璞治之正德中李燧亦以尚書治河嘉
靖初年江南白茅港之役李充嗣亦尚書
也

二百一

許紳南京人質實謹厚不喜交遊大抵有
恒人也以鑿術仕至工部尚書掌太醫院

事嘉靖西苑宮人之變 聖躬甚危得紳
藥始蘇余嘗造問 聖躬安否紳曰此變
禍不測論官守非余輩事切念受 聖主
深恩當以死報只得用桃仁紅花大黃諸
下血藥藥進余自分不効必自盡賴天之
靈辰時進藥未時 上忽作聲起去紫血
數升申時遂能言又三四劑平氣活血
聖躬遂安天地廟社之靈也以故加紳宮

保後數月紳病余視之曰余必不復起曩
西苑用藥驚憂所致至今神魂不寧百藥
不效余即死主上萬壽死無憾竟以此
病卒上憐之卹典甚厚

二百二

景泰元年五月漕粟十五萬石自丁字沽
舟行抵雄縣分給軍餉

二百三

國初湖廣有所謂靈通侯者鄱陽之役有所謂捨命王者二人竟莫可考

二百四

袁珙字廷玉鄞人少遊海上遇異人授相術論人吉凶輒驗 成祖聞廷玉名洪武二十三年九月密召至北平一見伏地叩頭仰對曰殿下龍質鳳姿天高地厚大明麗中神畧內蘊真太平天子 成祖問度

在幾何時對曰年踰四十紫髯過臍當是
時撥亂反正萬邦一統成祖喜留府中
久之已而乞歸靖難後召爲太常寺丞子
忠徹序班出金錢幣厚賞珙巡狩北京召
珙父子至行在出入禁廷未幾珙請老歸
卒贈太常少卿忠徹能傳父術建文初
文皇召問忠徹對曰天命有之無憂也獻
人象大成書靖難後除忠徹戎籍曾有言

楚王子重瞳者遣往視還奏無他異宣德
中嘗侍上言天顏慘肅恐宗人有急變
謀上者未七日樂安反書至官尚寶少卿
致仕卒年八十三

二百五

林見素劾繼曉下詔獄茂陵怒甚事且不測司禮太監懷恩叩首諍不可曰殺俊
將失百官心將失天下心奴不敢奉詔

上大怒曰汝與俊合謀誅我不然安知宮中事舉硯擲恩恩以首承硯不中又怒仆其几恩脫帽解帶伏地號泣曰奴不能復事爺爺矣叱恩出至東華門使人謂典詔獄者曰若等誣梁方合謀致俊死若等不獨生乃徑歸計稱中風不能起上怒辭命醫治疾屢使勞問俊得不死時星變繼傳奉官御馬張敏請馬坊傳奉者得勿

黜持疏謁恩跪庭下恩徐曰起起病足不
能爲禮問何爲曰得旨馬坊傳奉不必動
恩大聲曰星變專爲我輩壞國外臣何能
爲今甫欲正法汝又壞之他日天雷且擊
汝首指其坐曰吾不能居此矣汝兄弟一
家徧居權要又欲居我位乎敏素驕貴又
老輩聞其言不敢吐氣歸家憤恨死章瑾
進寶石求錦衣鎮撫命恩傳旨恩曰鎮撫

掌詔獄武臣極選柰何以貨故與瑾上

曰汝違我命乎恩曰非敢違命恐違法耳
改命覃昌傳旨恩曰外廷倘肯諫吾言尚
可行因諷余肅敏執奏吾且從中贊之余
謝不敢恩嘆曰吾固知外廷無人王端毅
爲都御史屢上疏論事言甚切直恩每嘆
曰天下忠義斯人而已力左右之卒免於
禍弘治初大開言路言者輒指內臣爲刀

之之餘覃昌大怒恩曰吾儕本刑餘之人
又何怒爲

二百六

王士寧生元至正甲辰至成化癸卯年百
有二十士寧少慕養生不受室飲酒食肉
走蜀入雪山投見一老人披氊衣卧深洞
中石牀上長三尺餘耳目口鼻手足皆類
小兒士寧頓首拜不答因執役左右老人

不飲食坐側懸一囊中類乾麵飢輒取啖
渴手掬飲礪水壹貳升士寧飢跪乞食老
人與囊中物苦澁不能下咽士寧拾啖山
果野菜居三年老人憐之忽曰吾語子術
子識之宜出山非其人莫授士寧出雪山
後事不可知其在濟寧居城東深巷敗屋
中已六十年濟寧人竊旁伺士寧久絕火
食唯日啖棗數枚或菜數莖飲水少許人

餽遺輒不肯受濟寧指揮王宣者海州人
往見士寧駭曰吾上世有叔祖士寧好道
棄家去竟不知所終翁得無是扣家事皆
合宣因日與來往成化七年朝廷下山東
徵士寧俾乘安車來楊文懿公道濟造士
寧問但曰靜坐寡慾坐久瞑目閉息曰我
老無能 朝廷過聽召我我未聞道但習
靜已久近乃日與人接大敗吾事文懿因

金史卷之三
問元末國初事曰一身之外百無所知

二百七

遼東之不隸山東先朝有深意遼山多苦
無布山東登萊宜木綿少五谷又海道至
遼一日耳故令登萊諸處田賦止從海運
運布遼東無水陸舟車之勞遼兵喜得布
回舟又得販遼貨兩便之後以來帶私貨
故禁止海船遂廢今布運者又不得由遮

洋運船海道須經京東出山海關入遼苦
勞視登萊海道何啻百倍此以人事言若
論地利遼東須直隸京師爲東輔

二百八

洪武初設太倉黃渡市舶司至今稱爲六
國馬頭尋以海夷黠勿令近京師遂罷之
已復設於寧波泉州廣州七年九月又罷
後乃復設提舉一人副提舉二人屬吏目

一人驛丞一人三提舉司皆然

二百九

嘉靖庚子北虜破大同塞深入山西時兵部三尚書張瓚掌部事毛伯溫掌都察院事劉天和提督團營皆不肯帥師禦虜起都御史翟鵬於家總督宣大偏保山東河南等處軍務駐大同境上鵬質直端勁外若惴惴內有經緯不善附權貴通賄遺有

前輩大臣風節柄臣惡之北虜退楮撻細
故閑住明年虜又至諸大臣益畏懼莫肯
出大同復起鵬提督如故以防禦功歷陞
兵部尚書甲辰兵部議掣防秋兵太早虜
直犯紫荆上大怒逮鵬詔獄謫戍邊行
至河西務借宿民家不納告之鈔關主事
主事撻民家留鵬宿民家告之東廠以聞
遂復逮鵬瘦死錦衣獄先是樊繼祖爲總

督喪師失律且殺良民報功侵費帑金數十萬以厚賂巧媚得無罪

二百一十

西南夷自國初爲梗洪武己巳征南將軍傅友德帥二十四將軍分駐湖廣四川練兵防西南夷友德尋召還時中原既定而西南夷屢叛用兵無虛歲

二百一十一

正德庚午逆瑾既縛治黨與長沙欲逮內閣曹元太監張永曰老先生勿開此路當爲日後計元得削籍去正德辛巳新都因言官論晉溪票擬下詔獄且將殺晉溪司禮曰萬歲今纔年十五王天官左班大臣一日至此恐日後事不可料大禮議時永嘉欲逮新都司禮亦不肯

劉千斤者荆襄大盜景太天順間河南北
襄南湖北流民聚動房山中者數十萬四
出行劫急或拒相歐脫官府捕之輒匿未
敢公然格鬪成化元年流劫鄧州李家李
家豪有力盡聞諸上官云不捕且入奏官
府集兵圍捕急遂糾衆反縛大王將軍國
老軍師先鋒推千斤爲主劉長子苗龍虎
副之石和尚爲謀主勢甚猖獗攻掠河南

南陽鄖陽西至漢沔東及蘄黃尚書白圭
撫寧伯朱永督諸軍進討至漳南湖廣總
兵李震以土兵來會議進兵方略千斤等
懼遂擁衆出戰屬永病圭督震分兵截勦
破賊賊退保巢寨我兵乘勝進攻破之擒
千斤龍光等和尙長子脫走盜深入萬山
中永病起帥諸兵入山搜捕襄陽文總旗
者諱都督喜信指揮張英下頗驍健遇長

子相搏不勝長子欲殺文總旗總旗曰榜
急石和尚汝無主名汝能縛和尚獻軍門
陞賞有榜例遂與俱見英英撫勞長子遣
去果誘獲和尚諸將忌英功大譁英匿賊
贓英俱不敢爭長子和尚竟以俘獻并千
斤等伏誅未幾千斤餘黨李胡子及野王
剛小王洪亦反都御史項忠討平之成化
年設潮廣行都司於鄖陽都御史一人

撫治寇盜稍息

二百一十三

方遜志在翰林寵任時薦西楊西楊修實錄乃謗方叩頭乞餘生西楊薦陳芳洲不薦東西兩王芳洲嗾人訐西楊之子稷稷竟坐法論死西市芳洲令徐武功更名以圖進用又力薦武功武功竟置芳洲於鐵嶺武功爲石總兵畫奪門之謀石總兵又

置武功於金齒近日永嘉貴溪亦頗類此
二百一十四

洪武十一年令考績殿最分三等稱職無
過爲上賜坐宴有過稱職中宴而不坐有
過不職下不預宴敘立於門宴者出然後
退十七年令方面官無侵郡縣之職

二百一十五

嘉靖壬寅起故右都御史萬鏜爲副都御

史勘處湖貴蜡爾山夷情明年萬疏有曰
此夷先是宣德七年用兵十二萬攻圍九
箇月勦賊過半正德七年用兵伍萬攻圍
四箇月勦少撫多今初擬用兵陸萬期以
半年臣博訪各賊巢穴如蜡爾等山接連
三省當其險絕之處晦冥之時一夫拒守
百夫莫前與其多兵以冒險而犯欲速之
虞不若減兵以存糧而圖持久之効乃減

兵三萬大抵以勦之威行撫之恩今雖平
定但地方大壞極敝苗夷易動難安目前
雖已寧帖而後患所當預防遂條上方畧
專意防守不事征進後至丁未遂大用兵
兩省騷動迄無成功萬又嘗有書與中朝
人士其畧曰苗賊巢穴如蜡爾雷公等山
峒接連湖貴四川周回千數百里徑悟所
居人跡罕至其懸崖鳥道莫可躋攀狹路

羊腸不容並足且竹箐叢生彌望無際幽
巖曲澗在在皆然鱗次櫛比殆無空隙人
非側肩僂背莫能入也賊從內而視外則
明每以伏弩得志我從外而視內則闇雖
有長技莫施審據軍前漢土官負曾經兩
廣滇蜀等處征進者皆云山峒之險峻各
省亦有之至於竹箐之深阻則所未嘗見
也其地利之難如此苗巢所居率皆險僻

幽翳天晴之日亦將午而後開朗未晡而
已晦暝但遇稍陰即霏霧迷濛尋丈莫辨
計其陰雨十常六七蓋山嵐瘴濕氣候鬱
蒸之所致也其天時之難如此先年上官
守法易以駕馭苗夷確魯易於牢籠自正
德以來邊方多故上官征調皆顧倩此苗
以爲前鋒用能克敵稱強及至近年上官
犒讐各厚餌此苗以助攻殺因而啓釁生

亂由是土人與苗互結姻親情多牽制且其技倆亦爲賊所窺破無復畏憚今用土兵不免前弊欲擯而不用彼以切近之地素稔之情不但引誘窩藏在所必有甚或借兵齎糧豈能盡防况湖貴官軍皆不足用湖廣除永順保靖之外其餘土酋可調之兵能出千數者無幾至於貴州舍酉陽平茶之兵愈少而愈難矣必欲別省調兵

則又不諳地理成功難必而其沿途擾害尤不可言決難輕調其事勢之難如此苗賊常言朝廷有千萬軍馬我有千萬山峒又云諸葛亮有七縱七擒我苗有三緊三慢所謂緊者軍退則突出劫掠所謂慢者軍臨則散漫潛藏又云不怕官府軍多只怕官府糧多蓋以軍雖多而山箐深險力未易施糧若多而圍困久長勢將自斃然

彼明知道路梗竄糧運甚難料不能多故
爲此言其狡夷巨測之難如此歷觀史牒
所云大率皆然故昔人云自古用兵未有
大得志於南夷者誠有以也前此兩省官
司非不知地方之害亦非無滅賊之心然
而莫肯以勦賊爲已任者蓋亦畏其難耳
况遠得於傳聞者恒失其實旁觀於閒暇
者每易其言不以爲邀功生事則以爲勞

師費財人亦何苦冒地方之利害而招已
身之艱危乎積習有年稔亂斯極其獨力
任事之難如此

二百一十六

京師在北平宣府大同視周漢唐朔方近
有言止守居庸鴈門此乃誤國之賊又或
言盡撤山西兵專力并守大同亦非良策
大寧築離鴈門門戶藩籬以禦外侮門戶

以固內防二者皆不可缺

二百一十七

近日士人知天文者多有其人惟光祿少卿樂護鳴殷華湘原楚爲精二人共上五星聚營室疏甚明暢懇切禮官覆疏亦直言規戒皆可傳

二百一十八

景泰四年八月工科給事中徐廷章條上

七事一重官爵部增尚書一人左右副僉
都御史至三十餘人人加師保名器猥濫
二慎師儒今教官多歲貢監生及山林儒
士素無問學輒爲人師授經且句讀不明
問難則汙顏莫對宜用副榜舉人便三嚴
科貢近科舉開額陝西山西百名三倍於
昔會試禮部百無一中歲貢亦四倍於昔
比及入監即以存省京儲悉遣還家請依

宣德正統例四部珎奇蠻夷屢貢金銀寶
石火鷄白鹿諸物未爲國瑞而傳道病民
納侮夷狄請一切謝絕五固封守河南山
東湖廣浙江內地可省巡撫官遼東永平
紫荊諸邊鎮不可缺宜定選二人更代無
使熟情僨事六禁諂瀆京師每節序男婦
雜沓寺觀淫穢敗倫乞懸榜禁約七誅阿
附吏部尚書何文淵以奸邪免官許資王

魏汪庭訓陳鈍何澄王遠皆依附文淵並
宜治罪上曰朕即位初加秩舊臣資匡輔
其如故餘下有司議報聞

二百一十九

大同古雲中宣府古上谷虜入大同塞必
犯紫荆倒馬入宣府塞則犯白羊居庸自
獨石邊外順潮河川南下則古北口黃花
鎮不能禦矣大同宣府有重兵古北口黃

花鎮兵最弱

二百二十

景泰三年沙灣堤壞遣訓導陳冕修築先是冕以沙灣功陞教授比沙灣復決冕奏言欲息斯患在用人工部惡冕請送冕山東巡撫責其成功否械赴京師旣得旨給事中陳嘉猷言朝廷嘗榜求治河之畧竟未有言冕嘗有修河績今更進言而工部

嫉之必欲置諸有罪之地人人皆將緘口不言其他利病甚於此者孰肯復言冕不廷卹而國體所關甚重乞令冕協同巡撫等官修築便上從之

二百二十一

南京城大抵視江流爲曲折以故廣袤不相稱似非體國經野辨方正位之意大內又迤東城且徧坡卑窪太子太孫宜皆

不祿江流去而不留山形散而不聚恐非
帝王都也以故孝陵欲徙大梁關中長陵
竟遷北乎

二百二十二

南京大內近多圯壞以王廷相建言故也
今端門樓已毀承天門樓將傾數年之後
當大壞宗廟火亦當復建神所棲也不知
其神在彼乎在此乎故成王在鎬京而文

武王廟豐及洛都皆有之夏言 九廟議
誣甚

二百二十三

永樂壬寅 上北征五月駐獨石大閱將

士英國公輔安遠侯升寧陽侯懋武安侯

亨陽武侯祿隆平侯信應城伯亨新寧伯

忠興安伯
亨馳射應城伯不中罷其領兵
隆平侯稱疾不至降辦事官

二百二十四

戴元禮名思恭以字行金華人學於丹溪
朱彥脩初仕御醫事 太祖藥餌輒效風

雨即免元禮朝洪武三十一年五月 上

病少間輦出御右順門召諸醫官治疾無
狀者盡付獄獨召元禮至榻前曰汝仁義
人也事無預汝無恐太孫即位誅諸侍醫
者獨拜元禮太醫院使遼簡王肅莊王慶
靖王皆奔喪至京聞太孫道 太祖語哭

問勞元禮簡王題仁義字大軸莊王靖王
爲贊詠賜元禮或曰文皇以舊恩陞元
禮院使者誤也初洪武丙寅文皇患瘕
韓公懋治久不愈請元禮至問所用藥曰
是也又問文皇嗜何物曰生芹元禮曰
得之矣授一劑夜暴下視之皆細蝗也晉
恭王病亦請元禮得愈病已復發卒太
祖怒遽治王國諸臣元禮侍曰臣嘗奉命

療王王飲臣藥數矣臣對王病毒在膏肓
即復作不可治今果然 太祖遂釋晉王
諸臣尚書嚴震直病 上令元禮好治之
否且償命一劑而愈有妃嗜燒酒腹痛治
之愈曰十年必復發發不可治後十年竟
病腹痛死王賓者吳中高士願受元禮方
書元禮索賓拜師事我我與方書賓不肯
一日詣元禮值他出有書八冊案上賓袖

去元禮歸驚嘆自失賓不娶臨終以其書
授盛啓東韓叔暘

二百二十五

嘉靖壬寅七月朔日食逐貴溪去時諸城
一人在內閣中秋分宜入內閣甲辰諸城
以二子舉進士爲言官所劾父子並削籍
數月後靈寶許太宰石首張宗伯二人同
入內閣丙午許乞致仕閑住去張病卒是

冬復召貴溪貴溪至而壽寧侯張延齡死
於西市戊申冬貴溪亦如之

二百二十六

溥洽字南洲浙江山陰人洪武初薦高僧
入京歷陞左善世靖難兵起爲建文君設
藥師燈懺詛長陵金川門開又爲建文
君削髮長陵即位微聞其事囚南洲十
餘年榮國公疾革長陵遣人問所欲言

言願釋溥洽 長陵從之釋出獄時白髮
長數寸覆額矣走大興隆寺拜榮國公床
下曰吾餘生少師賜也仁宗復其官卒年
八十二

二百二十七

南京吏部題名記首高暲洪武三年任次
張銘善次郎本中次陳脩又次滕毅毅註
洪武四年任今考毅於初設吏部時與楊

士義等六人爲六部尚書入見奉天殿受
面諭毅後趙瑁瑁後高嵩李信詹同同
洪武四年爲尚書兼翰林學士承旨七年
出吏部爲翰林學士承旨呂熙代之題名
乃云洪武七年任張郎陳三人亦非相繼
並在革中書省後爲尚書洪彝在翟善之
前劉松在僉斯之後題名以僉爲揭乃後
有洪彝而無劉松松署尚書陳敬余燦皆

試尚書尋爲真翟善驗封署郎中事主事
署部尋爲真

二百二十八

嘉靖丁未秋兵書陳經被劾王以旂代陳
未幾以河套議出陝西總督邊務劉儲秀
代之劉循例疏辭上怒削籍去趙廷瑞
代之不半年兵部更四尚書近年兵書最
久者張瓚邊事大壞自瓚始瓚有才畧無

柰其好貨何

二百二十九

洪武辛亥禮官崔亮定外官慶賀禮以武
臣爲班首壬戌廣東布政司請慶賀班秩
孝陵曰禮行於藩司班首以品秩敘今
都司無實授者惟實授都指揮使正二品
乃得爲班首

二百三十

吳元年選郡縣官二百三十四人賞綺布道里費及其父母妻子有差著爲令曰以養汝濫奉公無漁民也洪武元年詔中書省自今除府州縣官賜銀十兩布六疋徵天下賢才爲守令厚賜而遣之

二百三十一

蒲四固原土胡也驍健好殺時出劫行人掠牛馬聚惡少食飲叅將劉清指揮馬傑

稍法繩之四賂掠資即解即數日又復中
他事收捕捕至輒得賄賄已又捕四大恨
曰必殺此二人者成化四年四月遂反不
數月有衆二萬廷議請勅鎮守問激變故
勅未至清進與賊戰大敗寧遠伯廣義伯
巡撫陳价都指揮費良皆敗或死兵部請
合陝西延綏寧夏三鎮兵進勦賊益肆行
劫攻城殺掠吏民羽書交至以都督劉玉

爲總兵副都御史項忠提督軍務會巡撫
馬文升討賊忠未至陝陝西寧夏兵先至
不俟延綏兵輒進大敗四盡奪兩鎮軍器
開大兵且至退保石城山忠等分兵七屯
合圍之戒勿戰困賊伏羗伯毛忠違命先
登敗死賊益張言且攻西安兵部尚書程
信請改命撫寧侯永總京邊軍四萬往討
大設賞格擒四者賞金五百兩銀倍之官

世指揮使四人共亦如之十一月忠圍賊
益急度必破賊又聞別命將不敢輒止奏
言宜令新總兵星馳赴援倘不日破賊別
奏止兵上手忠奏付太監懷恩等召兵
部議內閣信曰兵行不可緩彭時商輅曰
賊不能出入山自保我兵困之甚固觀忠
疏賊不足憂也信曰不然忠且退至平涼
未可知敢必其能困賊耶尚書白圭侍郎

李震相視不言時曰然則度京軍當何時
抵固原信曰明春二三月時曰勝負決今
冬奈何至明年觀忠奏賊憊矣止京軍便
太監曰然然則邊軍去平時曰亦不去便
輅曰留京軍而遣邊軍便信大不平謂人
曰忠敗陝西動搖內閣不得辭其責內閣
又輒言忠足辦滅賊觀其疏歲終賊平矣
是月丁丑忠計擒四十二月捷音至明年

正月檻送四等三百人至京師太監問四
反故曰無奈清傑侵剝我也四等凌遲亦
斬清傑

二百三十二

皇祖製太廟祭器曰今之不可爲古猶古
之不可爲今禮順人情可以義起所貴斟
酌得宜必有損益近世泥古好用籩豆之
屬以祭其先生旣不用飲亦無謂其製祭

如生儀

二百三十三

宣德九年 上與侍臣論兩晉侍臣曰晉
武懲魏氏刻薄奢侈矯以仁儉平吳後頗
事遊宴怠政事掖庭將萬人然服用事勢
傾內外曾不一傳禍至閹閹致戎羯之
亂元帝繼統江右恭儉有餘明斷不足大
業未復禍亂內起明帝明敏有機斷故能

謫剪克臣惜其享年不永成帝以後類皆
孱弱寄命強臣奄奄百有餘年亦爲幸矣
上曰晉武創業不爲遠圖樹立失宜託
付非才况羗胡鮮卑雜處內郡不能先幾
區處以致國禍方殷戎寇遽至東晉僅能
立國逆臣接跡朝政陵夷尚傳數世由賢
人爲之用也又曰帝王維持天下以禮教
爲本兩晉風俗淫僻士習浮薄先王禮樂

教化蕩然掃地豈久安之道

二百三十四

嘉靖十八年五月夏言落職致仕尋復入
內閣以梁材爲戶部尚書六月丁酉震奉
先殿鼓樓災山西地震有聲如雷南京禮
部右侍郎呂柟致仕理河副都御史朱裳
卒七月遼東兵變庚寅震武功坊江浙大
水庚申葬 獻皇后顯陵閏七月木火水

金四星聚東井河南大疫辛未 獻皇后
祔廟 中宮亞獻咸寧侯仇鸞總督軍務
兵部尚書兼右都御史毛伯溫叅贊軍務
討安南九月虜數入宣府塞辛酉 上行
視長陵癸亥還宮十月大同總兵都督梁
震卒十二月虜入宣府塞

二百三十五

洪武十一年秋享太廟太常奏粟未熟請

以桃代 上曰諸祭果實不必常品有即用之著爲令

二百三十六

宣德九年罷築西教場先是教場在德勝門外欲移西直門 上命都督武興視可否興還奏可但徙民家三十六旣而有言其地皆民種麥苗栽棗果樹及古墳墓並須剷夷又白雲觀傍地皆民納稅蔬圃

上曰勿病民事遂寢

二百三十七

正德十四年二月乙酉司禮蕭敬傳旨

上自稱總督軍務威武大將軍太師鎮國
公朱壽巡幸南北直隸泰安神州丙戌又
傳旨南巡武選郎中黃輦車駕貧外郎陸
震上疏極言江彬席寵擅權迷朝誤國乞
誅彬罷巡幸上怒上初議以三月壬子

警道東巡祀岱宗歷徐揚抵南京下蘇杭
復浙江浮漢登武當人情洶懼將相大臣
多從諛不敢諫是月巳酉翰林脩譔舒芬
等亦疏諫各部及行人司皆懷疏集闕下
吏部尚書陸完沮之曰無歸惡於上衆退
是日吏部員外郎夏良勝禮部員外郎萬
潮太常博士陳九川明日吏部郎中張衍
慶等刑部陸俸等又明日禮部姜鑑等兵

部孫鳳等行人司余廷瓚等俱連疏入又有醫士徐鏊獨疏以醫諫上遂大怒不果出癸丑鞏震良勝潮九川鏊下錦衣獄芬衍慶俸龍鳳等百七人跪午門外五日甲寅廷瓚等下獄明日同輩等六人亦跪午門外五日械繫是日工部林大輅等三人大理寺周敘等十人連疏入明日俱下獄亦械繫跪五日金吾衛指揮張英憤曰

是大變故明效駕出必不利肉袒囊土手持刀欲自刎死上疏諫數日天色陰霾京師震駭公卿被唾罵瓦礫擲晨夕出入不敢待辨色至請命禮部禁言事者通政司遂格不受疏又有貢諛叅劾屬吏妄言者上怒遂不可解戊午水溢內海子不了橋高四尺鐵柱七斬折是日繫芬等一百七人午門外撻三十疏首調外任餘奪俸

年四月己卯繫鞶等六人午門撻五十
鑿戍邊

二百三十八

宣德五年十二月巡撫浙江侍郎成鈞奏
海鹽縣民言縣並海舊置石墩土岸延袤
二千四百四十餘丈備海患比因風潮衝
激壞者一千一百餘丈有司雖常修築然
舊石爲水所齧皆剝弊無廉隅暫用累砌

終不堅固今議於舊岸內別砌石岸而存
其舊者以爲外障庶可久遠乞如洪武中
令嘉興湖州嚴州紹興等府發夫匠協助
爲便 上從之

二百三十九

近日東南倭寇類多中國之人間有膂力
膽氣謀畧可用者往往爲賊躡路躋白設
伏張疑陸營水寨據我險要聲東擊西知

我虛實以故數年之內地方被其殘破至今未得殄滅緣此輩皆麤豪勇悍之徒本無致身之階又乏資身之策苟無怕心豈甘喙息欲求快意必至鴟張是以忍棄故鄉幡從異類倭奴籍華人爲耳目華人藉倭奴爲爪牙彼此依附出沒海島倏忽千里莫可蹤跡况華夷之貨往來相易其有無之間貴賤頃異行者逾旬而操倍蓰之

羸居者倚門而獲牙僧之利今欲一切斷
絕竟致百計交通利孔旣塞亂源遂開驅
引誘引徒衆日增若不包荒含垢早爲區
處恐數年之後或有如盧循孫恩黃巢王
仙芝者益至滋蔓遽難撲滅矣洪武年間
倭奴數寇東南傍海州縣其時浙江一省
旣遣信國公湯和築城又遣魏國公徐輝
祖安陸侯吳傑練兵又遣都督商嵩楊文

劉德出戰又遣都督於顯出海巡倭此皆
上公元矣謀臣宿將尤且遲之數年未得
寧息復遣南雄侯趙庸招撫沿海漁丁島
人鹽徒蠶戶藉爲水軍至數萬人又遣萊
州府同知趙秩禮部員外郎呂淵宣諭
倭奴迨至洪武二十五年以後而海上始
得安靖則凡可以解散賊黨者宜亟爲議
處也

二百四十

孝陵平漢封漢主陳理爲歸德侯友諒父
普才爲承恩侯兄友富歸仁伯友直懷恩
伯弟友仁贈南康王又封蜀主明昇歸義
侯洪武五年遣元樞密使延安答理送理
昇於高麗普才徙滁納哈出者木華黎裔
孫也旣降遣歸數侵遼東宋國公兵出塞
降之封海西侯卒葬南京其子察罕改封

潘陽侯坐黨死

二百四十一

長陵北征命侍郎師達督餉達以道險車
載民疲糗乏乃擇平坦之地均其里路置
站堡每夫一人運米一石此送彼接朝往
暮來民以不困食亦旋足

二百四十二

成化末年宦者尚銘坐東廠陳準繼之甚

簡靖令刺事官校曰反逆妖言則緝餘有
司存非汝輩事也坐檄數月都城內外安
之權豎以爲失職百計媒孽準自知不免
一夕縊死準廣東順德人

二百四十三

讀成布衣祭忠文詩成器餘姚人正統末
聞劉忠愍死獄即邑中龍泉山頂爲文祭
之祭畢以饒頒諸同志其文歷述古今權

奸之禍凡三千餘言人謂之祭忠文今其
地謂祭忠壇詩曰萬古興亡淚滿箋一壇
遙憶祭忠年大書筆在憑誰執高調歌沈
待我傳無地可投湘水裔有天應照越山
顛布衣閔世尤堪弔何處松楸是墓田邵
文莊公云

二百四十四

洪武三十年海運赴遼七年萬石有奇永

樂六年六十五萬有奇十二年北京五十萬由衛河通州四十萬由海十六年會通河運四百六十萬有奇宣德八年五百餘萬正統二年四百五十萬景泰二年四百二十三萬七年二百九十二萬天順四年四百三十五萬成化八年以後四百萬石又有江南常蘇松嘉湖白糧十八萬八百六十餘石山東河南粟米豆麥又若干石

不在四百萬數

二百四十五

我郡守楊公承芳乞致仕疏云錢若水居
樞密年四十而致仕以臣觀之臣年尤多
三歲陶弘景奉朝請年三十六而致仕以
臣觀之臣年尤多七歲放臣致仕死得與
弘景若水遊於地下足矣

二百四十六

席文襄公論漕船利害成化以前病在民
成化以後病在軍

二百四十七

沙州漢燉煌郡今爲蒙古衛川邊古塔赤
斤即漢屯田柳中地今爲罕東地仄沙赤
斤等處番達本皆一種枝大族分因地異
名耳

二百四十八

北狩永樂七年己丑也六曹稱行部十五年丁酉改云行在某部北京之爲京師不復稱行在也蓋自正統辛酉始也

二百四十九

元皇孫買的禮八刺被擒有故符寶郎以歷代靈章四十餘顆降孝陵以其不忠周之山東降將百餘人貌皆魁梧李丞相奏欲用之孝陵疑其結黨皆殺之

二百五十

漕船一萬二千一百四十三裏河淺船遮
洋海船十年一造免儀爪填也江南皆五
年一造往回皆經填也官軍十二萬有奇
二百五十一

景泰時南方葉鄧之變文臣總理軍務皆
稱鎮守浙江兵部尚書孫原貞福建刑部
尚書薛希璉

二百五十二

胡忠安公致仕歸常遣子長寧謝自敘由
洪武三十三年進士任尚書歷仕五十八
年中更迎駕復辟之勞及盧忠阮浪之獄
乞將臣男量爲錄用臣雖死之日猶生之
年天順改元八月十三日奉 裕陵旨胡
長寧陞世襲所鎮撫錦衣衛帶俸洪武三
十三年實建文二年

二百五十三

南贛與湖廣福建廣東相連流賊易起鄖
陽與陝西四川河南相界流民易聚故江
西湖廣既有撫憲此則又設提軍撫治之
官也南贛山深而人狡鄖陽土曠而民貧
二百五十四

莆田處士劉閔弘治中林見素言其恭慎
純粹學行高古日無二粥身無完衣而處

之裕如徐貫劉大夏每拜其門知府王弼
齋所必迎致曰對劉君鄙吝自去詞藻雖
不逮其爲人而德宇道風人自難及乞仍
布衣入侍 東宮有奏未上

二百五十五

洪武三年庚戌開鄉試明年辛亥會試是
年天下亦舉鄉試又明年壬子連舉鄉江
西吳伯宗辛亥狀元也解學士文有曰家

君以洪武四年辛亥主考江西蓋會鄉是
歲同舉解江西人遂主江西試事壬子則
今子午卯酉例耳

二百五十六

宣德四年七月太監馬騏矯旨下內閣書
勅付騏復往交趾開辦金銀珠香時騏自
交趾召還未久內閣覆請上正色曰朕
安得有此言渠曩在交趾荼毒軍民卿等

獨不聞乎自騏召還交人如解倒懸豈可
再遣然亦不誅騏也

二百五十七

漕運有元戎間以卿亞提督整理自河州
休庵王公以景泰庚午總督漕事明年兼
巡撫於是或右都御史或左右副僉爲常
設之官矣

二百五十八

戶部尚書梁公材南京人弘治己未進士
字大用號儉庵清修勁節始終不渝爲翊
國公郭勛所惡削籍初爲縣令歷知嘉杭
二府皆有惠政有儉庵奏議四冊

二百五十九

吏部尚書周用都御史宋景端明簡諒有
風節不肯依附人人亦不敢干以私嘉靖
丁未正月朝覲考察甫畢相繼卒善類咸

情之周贈太子太保謚恭肅宋贈太子少
保吏部尚書謚莊靖吏部侍郎武城王道
文學行誼表著一時難進易退晚得嚮用
是秋亦病卒

二百六十

戶部尚書王杲汶上人甲戌進士素稱清
謹但待屬吏稍嚴急當是時邊隅多事財
用不給杲一切取辦倉庫空虛嘉靖丁未

秋柄臣惡其執法又入親暱小人之言言
官又妄劾果受賄遂逮詔獄考訊誣伏謫
戍卒

二百六十一

朶顏在漁陽塞外福餘太寧建州海西在
遼陽塞外皆我藩籬食我乘驅懷我好音
久矣今皆通迤圯爲我邊患恐數年之後
圯虜見京東塞外水草畜牧之利將并朶

顏建州我東塞亦與北虜爲隣如宣府大同矣亟諭東虜無引賊入室自受其害如景泰時事諸酋或有悔悟者不然憂未已也

二百六十二

河南何瑋字粹夫有文學行誼高古灌園自給不妄取予潔身獨行君子也王廷相字子衡少勵名節博學能文別歷中外著

有聲績皆近時名臣後進奸言人短謂何
迂腐王晚年與翊國共督團營不能糾發
其奸可謂責人無已矣

二百六十三

太宰靈寶入內閣南昌代之因論其僂不
經不足崇信忤上意削籍蘭溪入吏部
病乞致仕忤上意削籍平於張家灣道
中都御史周白川代之病卒司寇聞石塘

代之南昌首論大禮始終不附張桂朴忠
自許有大臣風節數年間善類皆思靈寶
南昌

二百六十四

國初召商中鹽量納糧料實邊不煩轉運
而食自足謂之飛輓後因積納數多價值
亦賤興利之臣遂改議上納折色行之既
久習以爲常彼時改折糧料有餘而價亦

賤計似所入爲有贏利未爲不可近來糧料不足價亦騰貴徒煩轉糴邊用索矣大率鹽一引納銀五錢先時可糴米一石今多不過三四斗或二三斗故商人所納數倍於前而國初之所資以餉軍者實則無增於舊彼此虧費其弊益滋是故多得銀不如少得米省和糴之擾也杜侵剋之弊也慰待哺之望也漸墾邊地以致殷富也

一舉而四善具焉說者又謂閭閻開納本色召商不至蓋向者上納本色時商自募民耕種塞下而得穀爲易又塞下之積甚多而價輕又無戎虜之患今則耕種廢矣塞下之積虛矣穀價騰湧強虜出沒勢不安右商人安得糧料應召募乎欲復本色非減斗頭利商人使商人趨利而開墾邊地不可也然必遲之四五年而後得其大

利

二百六十五

張西磐潤自給舍歷官南史書行業無玷
其當逆瑾時著風節在工部昌言正色折
端國之驕悍一時大臣罕能及之嘉靖丁
未尚書一考址上改太倉尚書未上言官
論劾下吏部不與題覆候數月西磐自陳
曉至 內批致仕王爾洲學夔文學深淳

操履廉潔嘗爲文選郎中守正庇善類爲
張桂所惡出爲南太僕少卿改太常矣復
中他事降外任歷陞南禮吏二部尚書恭
慎簡實不屑依比人亦有才畧顧不肯發
揚人不知也其擒治鼎山中僞皇子事不
煩一兵亦不奏功嘉靖己酉累乞致仕不
允進南兵部尚書叅贊機務益力辭疏未
下言官又上劾章 內批三疏致仕

今言卷之三